

卷
811
326

彊
靜
齋

國
學
革
編

第
四
十
四
期

廣
漢
吳
山
著



國

學

業

編

善甫吳仲樞



著洪吟社第七十二課題目

愚君值課

詩題 闌干 七律二首不限韻

詞題 題余澹心板橋雜記 不限詞牌

詩鐘題 帳鉤 趙飛燕 分詠體

限正月十五日截卷卷交北京香爐營頭條胡同國學萃編社童補蘿君代收

第七十三課題目預告 詩題 火車 馬車 電車 洋車 各作七律

一首不限韻禁點題字 詩鐘題 豬 裏 嵌字鳳頂格 對偶出聯

古月胡爲照湖水 胡本從肉不從月茲借用之 此爲甄叟值課所擬特恐外省諸君得

題較遲故爲預告以後恕不展期交卷同上 著洪吟社謹啓

姓氏訛錯更正 第四十三期萃編所登異伶傳以及實獲齋文鈔內所載

張文祥傳皆係梅溪陳劍客所著手民誤排爲桐城陳劍潭李戴張冠亟

須更正特此聲明

本社編輯所謹白

定閱萃編諸君公鑒 本年萃編應由二十七期出至五十期止奈因手民
遲誤加以沈君太侔吳君夢蘭遠游遼瀋未歸社事紛繁以致本年應出
之書不能按期補足深抱歉仄尙希諒之今改擬明春正二兩月一律補
齊庶不使閱者有缺如之憾恐未週知特此謹告 本社拜啓

閱費未清之諸君鑒 萃編由出版已來荷蒙諸君贊助得以保全心感不
已惟萃編定章凡賜訂一份先交閱費而後按期寄書故有八扣九扣之
例倘屬先閱後費一律實碼不扣今因本年書未出全不敢與諸君以難
銖較量仍按八扣九扣結算此實本社推讓之道乃竟有藉辭書未出全
閱費不肯交下其實本社所開之賬仍照先費後閱之例何得欲先得書
而後交費本社實不能解忝屬同文當能體恤下懷故再贅筆聲明庶不
致有兩歧之誤也 本社再啓

馬死明日安徽學使蘇人殷兆鏞錄科士金陵發詩題曰去害馬一詩文人
故吏猶頌馬弗衰

贊曰太史公稱專諸豫讓聶政荊軻至矣然觀軻讓義矣而罔克成專聶成
矣而罔克義嗚乎此其所以爲刺客歟丈夫死生撐天地文祥盜賊耳異姓
之親無顧託乃獨舍妻子志厥仇赫然誅連帥威天下昭烈之報關侯何以
加茲事成甘一死不忍暴巨惡辱朝廷取義成仁高潔千古乃復耻亡命洩
家供吏虐備所云佛俠者耶敦謹仁賢官執法持天下平獨迫樞府濡默去
當大獄未定金標奉檄嚴自分必誅然獨不忍負文祥以負趙世忠復從而
碣之悲夫此兩人皆盜賊天下之大固自有豪傑哉固自有豪傑哉吾聞文
祥事四十年及今乃敢決所聞爲傳

先大父要集序

會稽 顧壽楨 祖香

序曰公初字鳳書贈朝議大夫梧選公長子也方頤廣額警敏絕儔博通六

籍經目無詭年甫勝衣遊于邑庠儀徵阮公見之曰閱覽淵識高密遺也字之曰鄭鄉而貢諸成均當是之時阮公方闢翹材之館宏釋詁之業書成奏御命曰經籍纂詁而公實典范史晉書名塵 乙覽越中多士公所尤篤趣袁鼎紀珩何蘭汀蘭馥周師濂邵騷邵颺僧方宏及公高第弟子王衍梅等相與切劘爲詩古文辭湖峴之間僦僦如也已而阮公撫浙治精舍湖上大集浙士其甲選汪家禧陳鴻壽以下九十二人曰講學士而公與焉於是孫先生星衍嘗繫節嗟賞曰搜石匱之墜文紹玉篇之絕學伊鄉之華實宗之秀爲書題其楹公既深爲阮公所知行必與偕灤京之朝維揚之居負笈相從不日不月於是始益爲詩歌與阮公之客江甯孫韶鄞童槐平湖朱爲弼錢唐陳文述秀水吳文溥石門方廷瑚凡數十輩朝夕酬和俊賞冠時居六七載而故尙書公鐵保爲其子瑞元求師于阮以公應選值海宇清謐所至燕暇迭相唱答蔚爲韻譚嘗持公詩嘆曰高華流利臥子有嗣音矣已而

尙書中吏議遣戍吉林公慨然曰微我無與急此難也行二年而還留客京師校書 武英殿得敘選天台訓導而公始歸於是公亦頗蕭瑟頹放倦於游矣閒爲詩筆相往復則惟台州守王厚慶故提學使者鮑桂星天台令張如梧其他應俗小品達意而已烏呼官天台九年而公以遘艱歸服終移武康而公遽歿矣悲夫悲夫公所爲文多放失不存獨說經之作間見阮公所輯經解詩歌則賴公手彙以傳諸先生訂定者十之七公所自寫著三而已故自公之居也盡交越才士出學於阮世所稱龍門焉既挹樵風若邪之靈遂賢明湖臯亭之勝中更木蘭天府之壯晚倚赤城仙都之奇縱轡擊汰亦甚鹿鹿鮮暇矣又戾時遇十上弗錄束髮遊太學皓首困鄉舉顛跋抑塞得不謂窮乎然此殆所以昌公之詩也公詩亡慮數千首爲玉笥山房集八卷先大夫老於行則簡錄其要以傳巾篋既困羈宦海隔烽火思以完集授劄氏因循不可得而先大夫迺奄然以棄養也烏呼瑯琊富文元禮襲思光濬

遺問律拾家集著諱任啓立仙臯幾湮會序及坡公寵緒蘇嶠緝嗟予小子捧硯而啜泣泰山其頽孔庭津涼伯魚旣以徂伋也旁皇阮公表行曰鄭之鄉小同之弗荷康成焉望會義訓之在耳而命予祖香朝手一編夕曠影堂孰越吟之弗懷焉飄流此異方獨嫫嫫焉發晏嬰之楹泣槍人之裳而勘手鏗乎傷也

茅津縣丞廳壁記

茅津古爲渡控豫鑰冀實要且衝舊設巡檢司資衛防典呵察職重矣顧於秩微無以鎮壓嘉慶中朝議升爲丞丞閒曹也乃其於斯則嚴重所寄責等於令符牒往來爰諮爰謀卽一旦有特請得直達郡監司蓋津之繫於丞與丞之見倚賴於岳牧如此其重也曩者南服稍不靖中州數困躡蹂烽狼在臺壘烏在郊斯津南直陝汝商踵繹旅錯趾或佻佻不可知屯候林植千輪萬旗爲雲爲靄丞故媿在汎游擊及其警也武備之責於丞供億之責於丞

舟梁之責於丞丞乎丞乎其於職又若是其難也丞之設逮茲近百年矣某守於茲懼弗克任旣久之爲石於廳壁哀前之姓名眉列可察觀嗚呼其賢歟其弗稱職歟書以諭後僚時同治元年八月

柴先生傳

柴先生者剛方勁節人也其名沂字魯泉世居金陵幼挺異通曉大節事父至孝父歿柴毀瘠立盡括遺衣服別爲一藏時節供享流涕設之諸所嗜食不忍食也數十年若一朝舉于鄉應春官試輒不第雷滯京邑慎立名節不妄言笑躡旣屢圭稜嶄然益不可干以私識者服其介或曰里儒也其行固然而知與不知莫不尊許曰柴先生成豐三年春九江告潰寇警徹江潞大吏檄附城者悉入保先生與焉圍旣合知不可守集家人詢所志皆奮曰有從先生死耳烏能澳忍苟活櫻當世之辱哉金陵故紛麗豪貴鱗處迫不得出悲泣填閭巷獨先生家晏然無戚容無煩辭城陷賊入或以絳幘衣趨而

呼曰降得免死先生憤甚繞屋而咤鬚髯戟張徐給其子省所親函閩戶火自內作見者莫能救先是庭有槁樹蒸然發五芝人以爲祥及難作而先生帥其婦及女嫂何其子婦宋嫠也皆燼焉凡五人火及他舍徐氏二婦人固不肯出亦死

論曰傳有之士窮乃見節義雖然士奚俟窮見哉柴先生秉確乎之貞挺不拔之操游聲熙時蛻迹汗俗雖復登金門謁玉階彼其於志固未有折矣夫勁松鬱于長夏而後抗凌霜之威時夜貞于暘旦而後彰警晦之信君子廉于平日而後見臨事之守故皓然之氣以其直也赤石之必以其不奪也是故佻幹軀激悍淑畢命赫熾之中十死而未悔且蔡州構禍顏公於焉奮擲臨安北靡徐生所由沆慨彼蓋興元之放臣成均之散材也君親篤于自然而義憤激于無二赫灼之烈炳焉罔符故不韋有言令此將衆亦必不北矣令此處人主之側亦必死義矣而董道自潔顧領不偶身鮮盈尺之枋位之

一命之據坐使危城豨突萬衆魚爛華門偕嵩構俱圯明月與瓦礫同碎烏乎豈不悲哉

義士張繼庚傳

張繼庚字秉元江甯縣人父介福以甲科累任知縣繼庚亦諸生癸丑之難諸生王京維首拒賊不勝赴水死又數月夏家銑以言賊死又數月繼庚死金陵死義士前後無慮百數三人死最烈繼庚既陷賊中惟徒死無益因與賊通往來偵伺間隙賊制括男子盡入營下令蓄髮壯者編軍伍弱隸各衙各衙者賊所聚輜重糧糈類所云聖糧聖庫者也老者充牌尾而別拘婦女爲館館二十五人削竹紉索舛輒浚濠稍不力鞭撻相踵凡男婦日食咸仰于賊人給米數合十日一散而各與寸紙爲符趣聖糧受給曰飛子鉤距苛密雖父子不得相顧泊大軍聚城下邏斥益嚴然賊固豺豕羣門者獲厚賄卽亦背其會縱出入繼庚以是與大軍通糾同志數百人潛署名一狀與大

軍約期以某夜斧得勝門迂軍入翦髮爲信內外合擊城可舉而覆也約既成及期夜三漏下繼庚帥百五十人點斂得勝門守者覺卽殺之斫門門開而大軍失期不至環城外多賊壘阻不得出亟散匿他所獸醫馬甲者險賊人也洩其謀于賊賊令在伍者以四更畢會人給飛子歸其伍毋得妄動散匿者無與焉平明捕至繼庚知不免亟納狀口中且嚼且咽縛至賊庭詰所與同謀者慘毒備至卽佯爲哀服歷以賊悍酋對賊憤其內訌隨指隨殺之蓋不啻十人矣賊悟其謀益大恚遂輟繼庚繼庚始終未嘗言同謀者夏家銑者與繼庚同陷賊憤逆燄恣睢官軍不以力討楚日剗心日夜悲咤發爲歌詩呵九元詆羣醜倨然激而不撓者也賊禁民食烟以爲大僂家銑故犯之賊怒搜其身得所爲罵賊詩襟袖皆滿戢香散地則囚之而逮其母若妻于女館家銑見母至幾失聲其妻笑曰若安得有母而服猶在身而忘之耶賊以五牛生裂家銑並殺其妻母竟獲免又有倪自修者賊脅就僞試作文

樓蓬山萬重迢迢弱水之渡史鳳卻寶雞之枕杜秋悲金縷之衣秋江蓉落不怨於東風春柳飛花定歸其淨土而又耽情雅望愛近文星脫珥佐觴強旣拂席鏢鈿作贅遂修門下之儀碧印鐫名私署閨中之號雲藍賭體星曉聯吟四壁波紅一樓岫翠大范之殘燈濁酒昌黎之銀燭金釵尙已嗚呼天涯淪落感青眼之無人門前車馬恨黃衫之不去一秋風起魂銷信子之車塵百季歌殘腸斷章江之鐘火又足哀已麗人能爲小詩喜詞曲銅盤寸蠟香口哦成絳樹雙聲曼歌膽怯於時陳公子壯黎公美周社事相期麗人背鏡訴愁添酒窺客識爲非常人鬪飲絃詩非二公不樂也清娛隨處盡品其名山通德每宵能譚其舊事春城月苦猶聆玉局之吟晚廡風初便學羅衣之舞初三下九雪夕花時衣薄更深鑷酒煖無何牡丹開而狀頭去梨園換而白髮新紫塞崆峒青天軒輕孤臣殉國百粵成塵祭酒生還必當慚摩卜賽黃門死節豈有負虜河東而麗人已不及見矣妖鳥遊魂五嶺之星辰

隕色跼鳶墮泊雙江之海水成龕十二玉樓故釘已失三千珠履殘丁猶新
將子不來永泣橫波之誅自君之出愁局飛絮之園麗人不亡當亦慨二公
之不成憂一世之如寄落花無主飄零叱利之身故國難歸流落老兵之手
而已然而麗人死有足哀者則不在兵火之摧殘而在妖嬈之劫弄也麗人
某日隨諸優卹墟賽社宿於所謂水二王廟者夜夢王刻期聘之爲妃翠袖
臨水空江照而已秋華釭暖堂飄雨颯而成夢醒而泣然長吟淋鈴比紅諸
句果以其時小疾而逝嗚呼悲哉娥臺質化瑤苑香空玉釵初授於上頭金
枕竟埋於入穴前溪十里怕歌阿子之詞月地一尊輒墮玉奴之淚寒泉半
盞野火三更斷碣沈煙荒庭度雨不亦過長干之縣恨觸於看花訪蘭陵之
街情深於賣酒虛噫嘻甄后凌波迺符銅雀之讖唐山傾國忽聘玉鸞之書
河水荒茫未聞巫返羅幃舒卷似有人開枕剗神鷄人喚陪阿嬈姐相藏嬌
婕春酣毗瑟鼓天豈過鳩磯訪小姑而去曾思兔魄借羿婦而奔生不學紅

綰入一品之家死迺爲帝女處三千之屋邪麗人當不爾也彭子羨陽故於
麗人最驩捐金爲營地梅均之西葬時諸名士持花植於墓上迄今過其地
者風煙掩抑怪石數峯叢灌蒼蔚郊鶩駭搏蓋相去三百季矣麗人色秣風
情故老遺聞多能道者而孤塋就圯廢址曠然從無勝流特與創護歲戊戌
邑人士將重修焉某五嶺才子三百詩人抱溫柔之情繫名勝之感爰迺鐫
之黃絹立之生金質之重泉諗之來禩蓋雅事也嗟虛玉釵千里錦瑟三生
金谷非綠珠之樓楚宮無桃花之廟紫蘭香逕西湖六代之人白木神祠東
海一坏之土臨風築鬻墮淚書碑弔勝國之黃土感花枝於疇日山邱華屋
固春夢之宛然舊苑聞歌亦酒壚之邈若况虛玉環鞮冷粟堆之烏鳥猶噉
鉤弋香闌銀澣之波瀾未歇感同不偶事豈無徵仰藉元文洪留麗蹟庶幾
雲旗水珮靈風來蔬葉之湖萬禩千春頌豔勝榴花之塔

南閣子讀書記

南閣子者余父僑居上海屋旁之小樓也余自卯角即與兄實君讀書其中門臨大江地遠塵市離塵絕形潔以蕭逸天青隔隔野綠滿簷浦潮送黃淞雨翦白風飄葉葉渡杯中而若飛遠山纍纍浮席上而可數閣下沙樹數株屋壁盡綠片雲孤鳥時來親人竿竹拳石亦解留客繞閣而西環以曲港短蘆作絮小桃散花頰鱗漾漪白鹿銜草春姿清華小景窈窕江居致佳且以永日吳子仲孺童子順初輒攜一樽來尋佳會瘦鶴立月即應門之僮疏松入櫺廼幃壁之畫幽賞既洽壺觴遂開折花當籌掃石布蓋野人送酒來譚古風溪童獻茶間薦鮮果白日將曛孤霞在空橫筵徐引繼以狂歌破琴不鳴寄此素抱夕而客去掩戶以讀秋蟲助其清響短燭搖其古魂雨晦雞鳴既見君子日暮途遠我思古人蓋齋居盤盤言笑晏晏歷寒暑十有二於此焉甲午南歸遂始別去閱歲十月會貢太學道出滬濱廼復過之則樓塵在棟落葉滿床陰几已歛墨痕未斲鈞石將沒苔印猶新蓋曾不一歲而蕭木

蒼涼文酒斷歌清景一去有同隔世此昔人所以惆悵黃墟之夢欷歔雍門之琴也嗟嗟今昔同脉朝暮已非魯國男子方有毀巢之驚金城司馬不勝種柳之感傷墜雨之邈若慨秋草之又生俯仰前塵盡成陳迹爰次而記之因寄實君實君亦當歎共讀之樂不可以長也

吟香室詩序

奉新許振禕仙屏

夫山川亭鬱富媪有配天之華焉儀璘旋照月姊有代明之采焉是以化熊石紐形魚嬪候人之詩覆燕玉筐玄鳥啓新妃之頌周篇三千用之邦國坤位六五含章文明東遷則許穆宋桓戰國則楚姬齊后莫不秉心淵塞掄問蘭芬吐春秀於當時擢秋芳於後世然則賢母垂詩三代之所同然也懿若董母楊太夫人閩海女宗梁溪望族響知伐衛道媿思齊梧桐始生鸚儀耀其朝彩蘋藻交映鮫宮蘊其神姿盤匱重闈則韻廣滌葛佩蔽萬里則笙秦綦桃教子以三遷擇鄰訓女以七篇垂誠從以孫子樂在含飴即是神仙無

煩服餌總其關山行旅風景謳吟爲五七言凡數百首哲嗣仲容割緝蘭華
雕鐫梨棗捧錦堂之繡帙金萱開辟靈之花讀瑤吧之珍題嘯樹倒迴鸞之
薤潘安仁板輿梓澤昔有前修束廣繼補簡蘭咳今聞繼美歸藏兩卷齊母
鄭母之經琴心二篇越妃楚妃之奏以余補明六義乞序一言余乃覽其比
興尋厥指歸是非不謬於風人美刺折衷於作者大明在亥衍其術爲貴登
天門小雅由庚審其篇卽別名吉日序詩者曰正而葩麗而則窮而工險而
易行若太夫人吟香室草其兼長乎可以序矣夫其珠碎芝芽星媿月婉總
惠山而擅秀苞琴水以標清額翦不言鑑鑿能詠斷君絃而辨韻藏姊硯而
學書堂上絳帷祖母宣文君之學壁中金石府君秦博士之編東山太傅問
道韞以毛詩河內女子補九師之說卦靡不吞爻悟象吹律定聲九十其儀
嫺幽風之禮十六能誦比廬江之才觀其梅花添雪之思何減柳絮因風之
慧迨其綵衣隨宦笄總承歡始茂嬪儀初隆婦順秦州番子近羸娥引鳳之

樓星漢天孫嫁董永豢龍之裔竹開萬穗實有韻祥麥秀兩歧同茲符采佳
兒佳婦備榛栗之告虔君姑祖姑顧芝蘭而色喜盛湘助祀卽頌季蘭鞠臚
稱觴便歌都荔十眉新譜崔家無時世之妝萬歲鄉君謝女擅偏憐之譽所
謂正而葩也萊氏逸妻已刻娛親之畫像秦嘉淑配復垂唱和之名篇想其
璇閨妙日錦瑟華年彤史司箴青娥鬪韻章臺走馬張京兆之畫眉海曲梁
鴻孟德耀之椎髻春水聽鷓之館秋齋聞雁之天賭酒擘經藏鈎品史繹詳
錄伯姬之義內女起例公羊鑿披香博士之言外戚慄茲飛燕至於當熊搯
虎能孝能忠擇主讓王知興知廢洞古今之正變識因革之源流豈如班妹
續書惟傳十志文姬請吏裁錄千篇雖復乙姊申襲皆工銘菊諸姑伯姊並
擅吟椒然而孝標孝綽只重三娘若鸞若昭最推次妹每當新妝賦就共羨
巧心險韻詩成競推妙手固已亭亭羣玉之表落落衆芳之列加以螽斯不
妒雌鷹能和嘒彼小星媵被南邦之化胡爲中露婢申北海之箋豈學唐山

夫人惟播房中之樂中山孺子無聞逮下之恩所謂麗而則也及乎陝服烽
煙周南留滯黃旗紫氣燒灞滄以屯軍青犢綠林下陳倉而連弩建章漢苑
亂臥銅犀武庫秦陵紛飛銀雁長離鬪虜仇池爲避亂之鄉太白旄頭兵氣
覆圍城之上一家分袂三處鄉心或入潼關或留天水新婦磯頭或有望夫
之石玉孃湖上不無思子之臺攜宋子與河魴值秦人之逐鹿城不沒者三
版月已歷於一周鄭受楚兵守陴皆哭燕圍齊縣不克而還竟能擁護龍鍾
脫身虎穴桑滄幾劫率土危而復安萍水乘風全家散而還合非夫心堅金
石識洞興亡知豎子之無成識真人之有自何能履虎尾而不啞陟羊腸而
敢驅旣而閒關西道返旆南轅奏事金天見蓮花之岳色尋源銀漢下竹箭
之河聲殷周故墟申息新縣行歌互答涉伊洛之風塵嘯詠自如履鄱陽之
危浪夏仲御乘舟之會羣公皆驚謝安石帆海之游衆人失色何必浮杯渡
鶴始號仙人斷壁斬蛟方稱壯士桑麻自課松菊猶存女布男錢織手草鞋

清浪灘頭波浪汎舟人有撓停不得珠泉直瀝窗櫺聞星沙斜撲船板側
堆亂石有鬼怪亂舞旗竿無顏色山之高下不及辨水之深淺莫能測瞬間
已是六十里江面何知闊與仄別有羣鴉逐隊飛當空恍如潑烟墨舟人道
是予有幸感得神兵相助力嗟予素非揚寶儔此際更有何功德况茲神怪
不可語中心詎敢自回惑但寄鯉魚尺素書爲報高堂好消息

吳麗生 淦泉

讀淮陰侯傳

垓下一戰重瞳走祿產豎子更何有呂雉爲呂鋤強敵先使漢家戮功狗沛
宮事後歌大風鐘室當年憑牝后英雄末路竟如斯悔不垂竿依漂母可憐
一代士無雙生死皆懸婦人手

焦山

深山滿修竹空翠上人衣樹影倚雲立鐘聲隨鳥飛
堂虛海氣近地僻市塵

稀散步焦仙洞蒼茫愁夕暉

招隱寺觀昭明讀書石案

石案尙橫陳苔花歲歲新空游招隱地不見讀書人古砌寒螿語荒臺瓦雀
馴履綦無處覓流水咽千春

夜航

俗名夜帶船裝載
行人不擇雅俗

舵尾月輪墮滿船霜露侵艣聲搖客夢鐙影入鄉心犬吠知村近鳥啼識夜
深斯人盡吾與邂逅亦朋簪

歲暮

戍鼓頻年振烽煙阻客行歲借資斧盡春共旅愁生梅萼寒猶勒松枝雪乍
晴吟魂閒不住飛夢到江城

鹽城旅夜

新暑奪三伏孤城懸一瓢世情和酒薄心緒伴鐙搖舊雨佳期阻涼風無處

招驛人愁不寐街柝聽深宵

古離別三首

客路有短長別懷無斷續淚滴玉階前年年作苔綠
一春看又盡何事不還家多應子規鳥啼不到天涯
只合夢中尋夢回仍不遇君夢故鄉來妾夢他鄉去

客中

回首南雲道路賒老親念我亦天涯卻思借得邯鄲枕不夢封侯夢到家

周慶榜

蘭生

畫龍

縱難天矯露全身頭角崢嶸幻亦真多少蒼生望霖雨有誰來作點睛人

雨後同家人納涼玩月二首錄一

良宵未許戶雙關雨過園林暑盡刪三徑菊松陶靖節一家詩酒白香山涼

生水色清虛外春在兒孫笑語間
羨片雲自來去此身還比片雲閒

杏梁 襄侯

題畫

一宵春雨杏花開紅映垂楊錦繡堆
遙指杏花楊柳外誰家長住好樓臺

柳絮

楊花撩亂撲樓臺欲往還飛掃不開
怪得東風溫似許一天暖玉熨春來

雪齊訪梅孤山

梅花三百繞山隈昨夜應催一樹開
渡水穿林無覓處好風忽送暗香來

黃有書 仲暹

送人歸蜀

木棉花落子規啼一夜鄉心到蜀西
流水斜陽人不見峨眉山下草萋萋

答浚南見寄

故人佳句定驚魂此日閒情待子論
滿地落紅渾未掃東風吹遍鷓鴣村

偶成

孤琴懸短壁默對欲忘機
落葉和烟暝殘花作雪飛
春愁濃似酒昨夢喚于衣
底事雕梁燕年年送客歸

戲浚南

剪雪裁冰想見之君家處士本如斯
不知今夜羅浮夢夢到梅花第幾枝

熊大垣 肅堂

送友人南旋

傷春傷別竟年年懊惱儂懷甚可憐
醉後歌筵頻慢客醒餘扶枕學參禪
園花搖落春無一鄰笛悽涼夢未圓
聞道君行行不得男兒終苦誤青氈
形骸早許還天地不死悠悠有此心
鴻爪雪泥徵故實鷄鳴風雨孰知音
眠時熱血醒時冷笑罵前人哭罵今
望裏西山烟景好暫携君手步苔岑

長門官柳送迎難綠色和烟尙未乾隔一層塵看月小話三年別正春殘
啾啾語鳴新砌噤噤鶯聲出畫闌此去不教回首望有人南向淚偷彈
不多朋輩知離苦久客風塵覺夢長芳草綠隨無綫腳落花紅亂惱春腸
嗟予不事皆磨蝎之子孤舟又到湘寄語故宮諸伴侶莫將顏色誤君王

感時示浚南

昆明池剩刼餘灰冶矢韜弓孰霸才秦帝已聞城朔漠漢皇無詔下輪台
飢鷹噉野秋眸睨胡馬窺邊夜角哀欲駕九虬携子去中朝今日起庸材

辰州道中

猿水蠻山曲曲過有涯生世奈貧何斜陽斷澗人爭渡夜雨秋原鬼唱歌
隨雁夢魂輕一葉歡魚心事託微波將軍廟貌巍然在風雨星霜總不磨

余 愴 勤夫

歲暮巴陵道中

朔風吹凍雪策馬問歸途店窄嫌人雜泥濘累僕痲居民爭饋歲縣吏尙催
租欲祭新詩句瓶中酒待沽

春居

伏處江湖遠孤吟愧小臣落花春似客當戶鳥呼人力學憐親老開荒補歲
貧空山風雨夜談笑有農民

宿毛口河寄完翁

獨投歸騎到荒陬應厭頻年作客遊月上高樓天在樹風來古巷夜宜秋
敝門雅士詢詩律入市苗姑賣石頭搗枕河聲驚不寐寫將離緒寄盤州

寄懷崔貞史知州陳時解官永甯

貴陽同駐馬慷慨髮衝冠世亂吾歸隱群疑君服官箸書排異學
奉母斷晨餐獨倚衡山頂秋風雁影寒

城南書院呈王雁峯師

頻年憂患并不訪妙高峯多士湖濤傑先生風雅宗忽驚鬢髮古猶記步趨
從挂席黔南後飄蓬感客蹤

聽園詩萬首一讀一流連婉轉倉山筆汪洋長慶篇早年謝冠蓋斯儘有神
仙笑向斜川去能將衣鉢傳

百事不如意還來讀我書吾生非少日此地亦安居池畔樓臺古園中花木
疏名山舊燈火慚負十年初

辰州上灘作

一篙偏趁逆風開滿耳灘聲似震雷河伯漫掀波浪惡輕舟曾自洞庭來

登臺城

弔古金陵獨上臺當年梁武最堪哀帝王末路遭飢餓城郭今朝幾劫灰半
嶺斜陽飛雁遠數株枯柳暮鴉回江山雄關應無匹坐鎮原須大將才

春雨遣興

五閱寒暑 明詔重興學此丐足以風寰垠奏之 天子疆吏責獨行立傳
待史臣吁嗟呼丐之用財若陶朱再散家產等埃塵丐之愛士如杜陵萬間
廣廈樂陶甄方今立憲教育愈注重強迫 詔令不日申財薄普及豈云易
將以丐事望薦紳我誦啓文一歎息作譔敬以告同仁此丐雖往道未湮安
得身化百千億力回海宇物同春

曾伯淵古歡室詩 和杜秋興八首

古歡室詩詞集係華陽曾伯淵女士懿所著女士爲袁幼安大令之室珏生
太史脚準之母蜀之名媛門有通德兄弟姊妹咸以詩鳴集中諸作情深語
摯不媿浣花之嗣音易實甫觀誓題詞有神仙福兮閨中備姊妹才名海內
知之句秦伯虞孝廉際唐有胸中煙景張春水眼底湖山杜浣花及劉家三
妹清於鶴荀氏諸郎氣似龍之句繆荻風師作序亦推爲名家謂以冷雲爲
之母紅蕉爲之姑蜀章季碩爲之弟妹根柢厚而淵源深所作自無凡響也

第三卷中有憶昔篇五排八十韵及和杜陵秋興八首感懷身世敘述家庭
婉轉綢繆性真畢露均非尋常閨秀之作所能比擬憶昔篇篇幅過長謹錄
和杜秋興以見一斑 女士作此詩時在辛卯秋間赴太和阻雨六安白雲
在天蒼波無極回憶故鄉骨肉大半天涯死別生離不勝悲感爰成詩八章
以寄兄弟姊妹詩錄於左

蕭瑟寒飆撼古林山川秋氣鬱森森蒼煙帶雨迷衰草白露橫江歛夕陰關
月冷懸遊子夢蜀鵲嗚碎故鄉心霜侵篷背征衣薄怕聽潮聲咽暮碯
極目長空雁字斜天涯有弟倚京華九階露渥凌雲翼萬里心縈碧海槎日
暮霜寒愁作客山高城小怯聞笳何時共飲茱萸酒笑傲東籬醉菊花 此情三四

弟於京華

出岫晴雲媚曙暉鳴泉百尺櫓聲微舟迴山翠侵衣溼人倚清空羨鳥飛
路悲絲嗟遠別青春聚首願無違消愁惟有詩千卷紅葉霜濃秋正肥 丁丑余歸

圓中叔俊四妹歸銅梁同時分手幸將來皖心竊慰之

斗酒新詩玉局棋鶴鶴飛散忽成悲魂招閩海春三月腸斷吳山秋盡時畢
竟有才天意妬忍教永別痛心馳鳴琅佩玉他年贈遺我懷中千載思 庚辰春得

仲儀三妹耗於圓去秋季碩五妹又卒於吳憶曩時花萼連芳歡樂無極不意丁年一別竟成永訣痛哉

百花潭水對峨山鬢鬢慈雲入望間樓榭遙連杜老宅松筠翠鎖故鄉關
閨多病憐遊子萊彩何年慰母顏脈脈寸心猶遶膝承歡頻有夢隨班 此情

風景尤覺魂依慈母

扁舟夜宿碧山頭楓葉斜陽豔暮秋月隱閩嶠魚信杳雲封劍閣雁書愁一
官淡泊清如鶴同病相憐瘦似鷗記得昔年離別苦不堪風雪過忠州 大官

二哥官晉均極清廉二嫂多病昔日相待最厚至今猶戀戀不忘

文成織錦奪天工貽我詩囊襟帶中寡鵠悲鳴吟素月茅廬課讀伴秋風桂
湖終古埋愁綠紈扇題詩漬淚紅宦海飄蓬無定所何如漁父與村翁 孟大

靜專從妹精於繡工均操柏志菴香六妹卒於新都昔日持扇索詩至今留於匣中

平疇雨潤綠透迤疎柳含秋映澤陂衙古松蟠蒼翠蓋庭開菊曠傲霜枝年

年愁病風塵苦夜夜鄉心四海移珍重天涯諸弟妹莫教兩鬢雪絲垂此到太和

暑景總結前七章

雙紅豆圖近人題詠

先高祖吉士公雙紅豆圖卷子嘉道間名人題詠有六十餘家之多洪北江王蘭泉法梧門張船山王仲瞿舒鐵雲諸作尤擅勝場余於戊申秋月手錄清本付諸梓人同光以來作者所題亦附入焉去歲宣統入都又乞趙春木都轉夫婦及馮果卿觀察嚴覓香太守陳伯潛閣學前輩陳石遺主政易實甫觀察諸君惠題詩詞附錄如左他日仍當續寫付梓也

誰將樹蕙滋蘭意寫入搓酥摘粉詞自度新腔姜白石重尋舊夢杜分司彈碁易近中心局骰子平添入骨思但得有情皆並世不辭重疊進芳卮 陽

湖趙椿年

絳樹濃春照賺東風離離子滿絲絲思邈想見才人多韻事採擷吟成句妙有蠶繭千絲縈繞拈得雙紅盃酒祝願連枝長徧情天早中著箇並頭鳥神仙一室愁應少證華鬢芙蓉並蒂芝蘭同抱消受瓊臆綉縹富福慧幾生修到又商略百年圖草尺幅吳鷓緘密緒比量珠記曲風懷好彩管麗丹青悄右調金樓曲 綺思瑤情未有涯百年韵事黯籠紗詩徵閬苑聯珠格筆染情天五色霞絳樹交枝生早徧靈鷲比翼夢無差人才老去芳尊冷著紙琳瑯璨墨華 陽湖呂鳳桐花題春木書

曾聞徐淑和秦嘉紙閣香生並蒂花怪底君身有倦骨天台新賦赤城霞椽燭修書璧月圓玉堂眷屬本神僊料應同作江南夢桃葉春風渡口船宗之瀟灑冠當時黃絹留題絕妙詞傳得清芬圖一幅碧桐秀出鳳凰枝夢回鈴索憶西清師鄭繼先桃李新陰手種成主津門客籍學堂更向藤蘿

添韻事四朝壇坫主詩盟 祥符馮汝桓

韻事流傳全盛時乾嘉諸老賭新詞仙心擷得雙紅豆說與頻伽總不知

瓣香遙接鄭康成家學東州自古名添寫數莖書帶草最難才子是經生

祝向東風得妙詮分明美玉種藍田傳家自有登科記輝映元燈一百年乾隆

乙卯光緒癸巳祖孫先後拾元自是佳話

滄桑百變太無因文采風流迹漸陳編得四朝詩史

定鳳池長見羽毛新

鄒太史徵輯道成同光四朝詩史成書有口矣

宣統初元已酉閏二月桐

鄉嚴震謹題時客津門

詞翰風流且未央承平尺幅有滄桑飄零情種今何限正恐東風也斷腸

老來歡念日銷磨便着禪塵亦不多却向軟紅作情語前賢失笑近賢詞

陳寶琛

牧齋天牧雙紅豆占斷江南一捻紅誰載桃根桃葉去隔江付與賣花翁千

古樊川有替人落紅惆悵定傷神大江南北皆南國一段悽迷畫裏春賜絳

骰子麗人行記曲拋殘聽餉鸚何苦萌芽方寸地和他摩詰與飛卿鷓波寫
韻蕊珠仙種玉藍田總化烟只有三星帶殘月茫茫碧海對青天 已酉三
月陳衍題

昭文才子江東秀手不拈花但拈豆壇坫詩名綠牡丹山莊韻事紅烏桐手

拈隻豆問因誰入骨玲瓏祇自知把酒東風學吳綺題詩南國寫王維銀屏

記曲春無限戲打流鶯當金彈種去還成玉一雙拋來定化珠千萬香國何

况有靈鷲館比鷗波福慧兼莫惹石家添醋醋試看玉貌未鬢鬢名家欲過

吳中惠賢裔徵題芬不墜風流我認兩前身卷中船山仲雅皆有余前身本事文采君追諸

老輩讀書晴窗拓碧紗詩魂猶戀玉鴉叉證痕即是相思種化作涼紅一種

花 漢壽易順鼎謹題

張文襄詠僧忠親王詩

科爾沁僧忠親王驍勇善戰能結馬隊為螺旋陣進退操從無不如志撫馭

將士尤得其心故人樂為效死曹州之役軍民皆哭失聲張文襄廣雅堂詩集弔僧郎七古有艱苦廉樸鑿天地之句允為定評今日親貴多挽軍符竊謂軍法營制容有新舊中外之殊而必以艱苦廉樸為本乃能決勝千里則亘古不易之理一旦疆場有事躬桓貴胄均能以僧郎為法吾國之強當可翹足而俟也文襄詩云南軍尙持重北軍尙剽疾湘淮兩幟戰江表何北獨有名王一中原曠蕩幾千里銜騎騰蹴一萬匹神京既奠遂南下年年征討無休日海東勁卒材昂藏東三省馬隊漠南蕃部性雄強內蒙左四十九旗目瞋語難誰能馭指揮赴敵如驅羊射雕羽箭二斤重詐馬繩竿九尺長正兵螺旋迭進退奇兵鳥翼相舒張不知何者為兵法但見萬馬併為一馬無能當王全古來營陣之法自言吾隊不論多少戰時合為一人一馬連鎮街馮官屯杞縣城金樓村白蓮池上東搶滅馬山口外西搶奔大沽夷船亦奪氣蒙城苗練先亡魂大功數十小戰不知數所到驚呼王面如天神王爾正赤見者驚為關壯穆誠感悍鎮化野性陳國瑞善戰而最榮

王忠誠奉指授良將成高勳張曜宋慶自從王征殘寇狂走趨戰迫強弩穿合唯謹縞不自惜紅旗一隊稱軍鋒先向平原酒戰血紅旗馬隊幾曾浣芻蕘一束時難尋艱苦廉樸鑿天地家家私祭同沾襟嗚呼異姓賢王羅青史李郭徐常非其比不獨戰功近掩策凌超勇王合將忠誠遠追擴廓奇男子

朱古微晚登江亭七律

朱古微侍郎晚登江亭云薜茑亦隨人作計暫逃初地灑塵纓嬌春羅綺不挂眼倚閣鶯花空復情殘客未宜苛畔岸清尊政要與將迎悵然欲別無他去醉及街西缺月明詞瀟洒而意沈鬱極似荆公集中得意之作斷句如瘦馬羸童從爾嬾烏紗白鳥與人清東阿道中機息林香發天清槍影來安樂無難

鳥傾橐買花欄病脚蘇殘暑澄心落古泉何氏民賦均疏薄有別趨侍
為當代詞家詩筆亦迥超凡近余於丁春農前章處得讀侍郎戊戌
前舊作凡三十餘首附記嵯略於此

屏子詩話論溫柔敦厚之旨

近見某日報附錄有詩話一種不知為何人所撰惟自署曰屏子其論溫柔
敦厚四字之義頗為探源扼要精確不磨學詩者不可不三復也 溫者反
乎枯者澁者而言之也四時之氣惟春獨溫溫氣益於兩間然後草木暢茂
禽獸繁殖惟詩亦然必元氣渾涵生趣洋溢方不落枯澀一派郊寒島瘦
病在祇坐不能溫耳柔者不直不激之謂也詩以諷諭為主或指陳軍國之
瑕疵歌詠生民之疾苦咸當委婉出之庶言者無罪聞者足戒能委婉斯柔
矣若直言無隱一意激切聞者愧恥若撻於市轉使拒諫之力益強飾非之
計益熟則詩之為害亦益烈矣敦厚者輕薄之對名詞也易臨卦曰敦臨吉

吉由于敦故敦麗足規風俗之美詩品不敦則人品亦壞未有人品壞而風
俗不漓者敦而繼之以厚亦有微義存焉詩人立言祇貴諷刺不貴汚穢
貴規勸不貴訕謗太史公曰小雅怨誹而不亂不亂者厚之至也所謂當
斷決絕之候仍寓愛惜冀望之心者是也故必終之以厚而詩教始大備漢
唐以下識此意會者十餘人耳偏至之詣雖亦名家究不足與論三百篇精
義也

陳伯嚴散原精舍詩

戊申十月紀哀七律
哀古五

戊申除夕五律

晴廬

陳伯嚴前輩三立於庚戌孟春月以散原精舍詩集什聚珍版印行前輩之
詩專學宋人鎔鑄萬有氣象雄渾而思力沈着百年以來詩家罕見其匹鄒
蘇堪京卿序云伯嚴莽蒼排奐之意態卓然大家未可列之江西社裏也蘇
堪詩學至深信為不刊之論前輩亦服膺其言故存詩自辛丑始余謂前輩
忠孝人也惟其忠孝之熱誠蘊結盤互於胸中而於吟詠之事致力又至為

邃奧故光氣燭霄不可磨滅豈特不能以江西詩派囿之如戊申十月紀哀
 靖廬述哀等詩即謂為天地間之至文與陳情出師瀧岡諸表並傳亦無不
 可戊申十月 孝欽顯皇后與 景廟先後晏駕薄海同悲夏劍承觀察賦
 紀哀詩七律伯嚴前輩和之時將還西 云兩宮隔夕棄臣民地變天荒紀戊
 申萬古奔騰成創局五洲震動欲歸仁月中猶暖山河影劍底難為傀儡身
 煩念九原孤憤在忍看宿草碧燐新又光緒三十四年除夕云夢寐餘今夕
 佯狂更異鄉卜年成痛定微尙待天昌霽影水圍燭盆枝雪孕香一尊吾自
 照撒手到羲皇二詩均沈痛不忍卒讀

靖廬述哀詩五古五首係辛丑年作 昏昏取舊途惘惘穿荒徑扶服靖廬
 中氣結淚已凝歲時辟踊地空棺了不賸猶疑夢恍惚父臥辭親聽兒來
 父牀萬喚不一應起視讀書帷蛛網蠶相映庭除迹荒蕪顛側盆與飯嗚呼
 父何之兒罪等臬鏡終天作孤兒鬼神下為證 架屋為層樓可以望西山

綠水盈盈滿新荷漸漸舒兩三碧葉展清渠好當微雨過看珍珠

憶蘿月

寸心無緒目極關河路夢裏依稀相見處昨夜小窗風雨 無聊長日空耽
 況茲清夜何堪雲影乍明乍暗朦朧月在西南

敘頭鳳

秋天碧秋雲白風光如此真堪惜閒愁性清愁病心頭怕想眉頭難隱忍忍
 忍 遊山屐吟詩筆一般情興都蕭瑟無名恨無聊悶將來塵海過來夢境
 醒醒醒

醉花陰

目赤

慧眼生來秋水淨驀地生微暈大好豔容光天半春星苦被朝霞映 此病
 染人同射影諺語從來信倘許目成時過我何妨只要伊人肯

浪淘沙

渴眼未全蘇幾度模糊秋宵難得看雲車好借一天燈火力飽認僊姝
年紀十三餘髻未曾梳莫來脂粉本嫌汚難得相逢今夜裏澹澹施朱
憶昔苧蘿居門射情渠小橋南去自通湖難得飲將湖水慣秀色誰如
往歲屋新租雅近吾廬仙人原不隔蓬壺只是朝朝相見易轉復愁余

彭

瑛 字星勛河南夏邑縣人官廣西鹽道署廣西布政司使有詩餘一卷

百字令 題陸子範太守枕琴山館圖

拓齋十笏有青山環繞碧雲遮護仙吏當年曾臥治玉軫金徽竊具石上泉
紅林邊月白得意都琴趣安排藤榻綠陰正好眠處 鎮日掃地焚香攤書
讀畫風味閒於鷺偶倚隱囊涼夢遠簾外濛濛衣露楊柳前灣木蘭短楫欲
問西冷渡放衙人靜任他倦鶴來去

滿江紅 題李薊林司馬觀潮圖

管領湖山天付與雄才闊調倏放眼風濤萬疊海門秋早鐵弩三千歸掌握

銀仙十二森懷抱賦委蛇退食自公來江天曉 奔雷擊驚霆掃捲松岸吞
雲島又橫空幻出樓臺七寶是第一流形勢壯擅無雙譽官聲好慕銅琶鐵
板唱江東坡仙老

賀新郎 題紅線圖

記室非耶是好青衣花前撥阮燈前讀史驚地西來鞞鼓急不覺龍吟秋水
要長價薛家門裏電掣颿馳裁一瞥啓枕函易若探囊耳聊借手報知己
公然裝束天人比倚闌干烏蠻梳髻青絲擊履銅雀荒臺明月夜影共碧雲
千里人爭豔西方彼美白戰教他心膽破料飛仙游戲常如此剛掩卷大風
起

賀新郎 題張子曙茂才墨華遺稿

萬斛秋聲裏忽敲門曇華一現才疑仙鬼家近晴川芳草畔爭說無雙童子
引江漢前腸滌髓詩與白雲俱縹渺控鶴人君或前身是肯挂眼青和紫

玉樓召賦驚彈指忍狼籍殘膏賸馥囊中篋底記別鶴鴿原上路情緒纏綿
乃爾更數甚河梁蘇李夜兩傷神春斷夢身後名應感兄料叶理問塵世知
音幾

賀新郎 題徐鐵孫觀察飽喫飯多讀書圖

溫飽平生恥是何人正襟危坐古香堆裏循吏儒林堪合傳名噪南州孺子
驚轉盼攙搶東指七尺珊瑚紅架筆走霜毫怒涌江湖起萬言檄馬曾倚
宦游我亦饑驅耳欲人生腹真不負眼中有幾豎子英雄休再論一笑置之
而已且自把千秋料理海上軍儲勞借箸勸加餐努力酬知己讀書事要知
此

胡熙壽 號萃齋湖南甯鄉縣人
著有天瘦閣詞一卷

齊天樂 同易枚臣客滬上作時枚臣將有日本之游

乍時征舸連江下西風又催人別蘭芷春心茱萸秋淚客裏共秋佳節笙歌

未歇問塵世幾回高樓夜月酒醒明朝有人相憶海天闊 京華誰念倦旅
祇舊盟鷗鷺堪訴蹤跡燕月侵眉吳霜點鬢重見想應悽絕飄流一葉況亭
角黃昏斜陽紅抹付與浮桴日華東處說

摸魚兒 丁未秋夜宿召勳齋中借枚臣作

鎮相逢乍涼天氣黃昏偏作愁語蕉心捲盡荷聲碎一任紅辛綠苦秋暗度
漸透入茜紗尋覓都無據幽情似訴聽響迴廊滴殘更箭好夢爲伊誤
人天恨舊日鸞儔鳳侶飄零今在何許淒涼剩有悲秋客生被西風欺負簾
捲處又慘慘悽悽葉落梧桐樹愁心忍賦試看取明朝芙蓉鏡裏白髮又千
縷

水龍吟 題袁小傳吏部畫國雜劇用其自題韵

京塵浣盡春衫多情無那東風老夢華一瞥淒涼如此春花半槁流水高山
曉風殘月幾人同調問中郎詞筆竟成底事空自羨仙蟬飽 時世蛾眉誰

掃醉喧闌輸他年少閒愁閒恨襟前舊淚袖中新稿玉筍長歌錦袍狂放衝
悲髡笑便江南花落從頭細說有誰知好

曹楙堅 字良甫江蘇吳縣人光緒壬辰進士官
浙江按察使著有曼雲閣詞鈔一卷

江城子 集詞牌

探春春曉摘紅英賣花聲隔簾聽眉嫵風流疏影柳梢青調笑翠樓鸚鵡曲
端正好凭闌人 瀟湘夜雨碧雲深別銀燈訴衷情芳草關河薄倖怨王孫
款乃扁舟尋舊約南浦月月中行

點絳脣 燕

巷冷斜陽乍歸不識江南路亂煙深樹夢踏楊花去 回首天涯舊恨知何
許雙棲處畫簾低護又是瀟瀟雨

風入松

酒醒燈炮費思量無計問蕭娘東風不管垂楊恨卷飛花隔斷紅牆認得爐

家雙燕而今已是空梁 歌殘金縷暗迴腸空認合歡牀相思記否簾陰路
小屏西略度衣香賸有舊時明月夜深猶照淒涼

探春 水鄉秋爽歸櫂容與倚蓬吟眺言愁欲愁矣

淺激流漸圓沙占石歸帆遙指村樹繞岸霜砧沿門水碓絕好漁鄉閒住吹
盡蘆花否待寄語征鴻休去料他多少羈人年年添賦離緒 依舊月如眉
嫵怕到得圓時重照淒楚甚日幽棲閒扉深掩商略翠荒苔古聽徧關山曲
總不抵一聲嗁字試傍溪灣舊懷容證鷗鷺

人月圓 夢得輕帆八字醒後足成此闕扣舷悽調渺渺分余懷也

煙蕪漠漠平林外鴉影帶殘陽欲寒天氣山濃水淡如許蒼涼 寄愁長是
書回鴈雪秋老蛩霜相思人遠輕帆載夢飛過瀟湘

渡江雲 蓬窗孤坐觸景蕭寥賦寄里門諸子

遙空鴉點散菰荒蓼冷落葉趁西風晚潮初上後隱約寒星和月照疏篷

枝柔勝聽乍響疑是來鴻尋翠娥小樓還記人影燭花紅 愁儂盟鴛語在
化蝶心孤算前番如夢夢不到吹笙院落撼簾櫳琴裝料理西湖去問故
人清興誰同梅信早江天絲雨濛濛

少年遊

春寒惻惻畫樓陰風定篆煙沉番番有淚番番無夢長是擁孤衾 近來雙
鬢絲絲換時節易侵尋桃花漠漠絮情悵說不盡杜鵑心

蔡鴻燮

字藻延浙江桐鄉縣副貢官山東
官台場鹽大使著有養靈根堂詞

三姝媚

寒柳

涼颼吹墮葉記當年靈和風流銷歇送遠依依想江潭猶有長條堪折陌上
花驄憶青眼曾傷離別忍見而今長笛聲中冷煙縈結 換了搓綿時節況
燕老鶯嗁怨情誰說送盡流年算多情惟賸舊時明月已是漂零肯再負煙
凝香裏好待江南春返樓陰翠接

幽夢續影

鎮洋朱錫綬撰著

江都

吳仲夢蘭校刊

真嗜酒者氣雄真嗜茶者神清真嗜筍者骨隱真嗜菜根者志遠

栗隱師云擬唐嗜筍檉帖曰神清半為齋茶錄志遠真能嗜菜根

鶴令人逸馬令人俊蘭令人幽松令人古

華山詞客云蛋令人愁魚令人閒梅令人癡竹令人峭

善賈無市井氣善文無迂腐氣

張石頭云善兵無豪邁氣

學導引是眼前地獄得科第是當世輪迴

陸眉生云睡倡優是眼下惡道

求忠臣必於孝子余為下一轉語云求孝子必於情人

熊篋給云情人又安所求之
王問萊云必也其在動心忍性中

造化善殺風景者也其尤甚者使高僧迎顯宦使循吏困下僚使絕世之姝習絃索使不羈之士累米鹽

補桐生云和尚四大皆空雖迎顯宦無有顯宦

日間多靜坐則夜夢不驚一月多靜坐則文思便逸

黃鶴笙云甘苦自得

觀虹銷雨霽時是何等氣象觀風回海立時是何等聲勢

陸又珊云我師意殆謂改過宜勇遷善宜速

貪人之前莫炫寶才人之前莫炫文險人之前莫炫識

悼秋云妬婦之前莫炫色
懺綺生云妄人之前莫炫才

文人富貴起居便帶市井富貴能詩吐屬便帶寒酸

華山詞客云不顧俗眼驚
王寅叔云黃白是市井家物風月是寒酸家物

花是美人後身梅貞女也梨才女也菊才女之善文章者也水仙善詩詞者

也茶藤善談禪者也牡丹大家中婦也芍藥名士之婦也蓮名士之女也海棠妖姬也秋海棠制於悍婦之艷妾也抹麗解事雜髮也木芙蓉中年詩婢也惟蘭為絕代美人生長名閨耽於詞畫寄心清曠結想琴筑然而閨中待字不無遲暮之感優此則絀彼理有固然無足恠者

眉影詞人云桂富貴家才女也剪秋羅名士之卑妾也
省綠師云普願天下勿栽秋海棠

能食澹飯者方許嘗異味能溷市井者方許游名山能受折磨者方許處功名

鄭孟云然則夫子何以不豫色然

非真空不宜談禪非真曠不宜談酒

蓮衣云居士奈何自信真空
香祖主人云始知吾輩大半假托空曠

雨窗作畫筆端便染烟雲雪夜哦詩紙上如灑水霰是謂善得天趣

詩盞云君師盛蘭雪先生云冰雪窖中人對語更於何處著塵埃冷况髣髴

凶年聞爆竹愁眼見燈花客途得家書病後友人邀聽彈琴俱可破涕為笑
沈石生云客中病後凶年愁眼奈何

觀門徑可以知品觀軒館可以知學觀位置可以知經濟觀花卉可以知旨
趣觀楹帖可以知吐屬觀圖書可以知胸次觀童僕可以知器宇訪友不待
親接言笑也

香祖主人云此君隨地用心吾甚畏之

余亦有三恨一恨山僧多俗二恨盛暑多蠅三恨時文多套

趙享帝云第三恨務請釋之

蝶使之俊蜂使之雅露使之艷月使之溫庭中花幹旋造化者也使名士增
情使美人增態使香爐茗碗增奇光使圖畫書籍增活色室中花附益造化
者也

星農云噴筠之畫庭中花噴筠之詩室中花

無風雨不知花之可惜故風雨者真惜花者也無患難不知才之可愛故患
難者真愛才者也風雨不能因惜花而止患難不能因愛才而止

仙洲云姓日則花之發泄太甚富貴則才之剝削太甚故花養於輕陰才
醞於微晦

琴不可不學能平才士之驕矜劍不可不學能化書生之懦怯

香論詞客云中散書琴去不得矜矜二字
畢雄伯云氣靜則矜矜自化何必學琴氣充則懦怯自除何必學劍

美味以大嚼盡之奇境以粗游了之深情以淺語傳之良辰以酒食度之寤
貴以驕奢處之俱失造化本懷

張企崖云黃白以慳吝守之翻似曲體造化

樓之收遠景者宜游觀不宜居住室之無重門者便啓閉不便儲藏庭廣則
爽多累於風樹密則幽夏累於蟬水近可以滌暑蚊集中宵屋小可以禦寒
客窘炎午君子觀居身無兩全知處境無兩得

少郭云誠如君言天下何者為安宅

憂時勿縱酒怒時勿作札

栗隱師云非杜康何以解憂

不靜坐不知忙之耗神者速不泛應不知閒之斃神者真

錢雲在曰不閑歷不知幽夢積影之說理者精

筆蒼者學爲古筆雋者學爲詞筆麗者學爲賦筆肆者學爲文

錢翰云筆高渾者學詩

讀古碑宜遲遲則古藻徐呈讀古畫宜速速則古香頓溢讀古詩宜先遲後速古韻以抑而後揚讀古文宜先速後遲古氣以挹而愈永

樸亭云若得摩詰輞川真本肯使其古香頓溢乎

物隨息生故數息可以致壽物隨氣滅故任氣可以致夭欲長生只在呼吸求之欲長樂只在和平求之

澹然翁云信數息而不信導引何耶

雪之妙在能積雲之妙在不留月之妙在有圓有缺

二如云月妙在缺天下更無恨事
香翰云山之妙在峰回路轉水之妙在風起波生

爲雪朱闌爲花粉墻爲鳥疏枝爲魚廣池爲素心開三徑

梅華翁云一二句畫理三四句天機第五句古人風

築園必因石築樓必因樹築榭必因池築室必因花

春山云園亭之妙一字盡之曰借即因之類耳

梅繞平臺竹藏幽院柳護朱樓海棠依閣木犀匝庭牡丹對書齋藤花蔽繡闌繡毬傍亭緋桃照池香草漫山梧桐覆井醅糜隱竹屏秋色倚闌千百合仰拳石秋蘿亞曲階芭蕉障文窗薔薇窺疏簾合歡俯錦幃櫻花媚紗幘

鄂生云紅杏出牆黃菊綴筵紫藤掩橋素園藏室翠竹轉戶

花底填詞香邊製曲醉後作艸狂來放詵是謂遣筆四稱

師白云月下舞劍亦一絕也
怡雲云絕塞談兵空江泛月亦覺雄曠

談禪不是好佛只以空我天懷談元不是羨老只以貞我內養

稚蘭云談詩不是慕李杜只以寫我性情

路之奇者入不宜深深則來踪易失山之奇者入不宜淺淺則異境不呈

驚甫云知此方可涉歷

木以動折金以動缺火以動焚水以動溺惟土宜動然而思慮傷脾燔炙生冷皆傷胃則動中仍須靜耳

栗隱云藏府精微隔垣洞見

習靜覺日長逐忙覺日短讀書覺日可惜

桐生云客途日長歡場日短侍親日可惜

少年處不得順境老年處不得逆境中年處不得閒境

淵雨云中年閒境最是無怪

素食則氣不濁獨宿則神不濁默坐則心不濁讀書則口不濁

哉隨所業皆產也且中國之法旦夕紛紜昨之所尊今之所棄獨吾術自秦唐千百年乃無盛衰當明季時烈皇帝已崩景山流寇洶洶馳闕下正陽門肆劇且歌舞歡呼流寇遍戮士大夫此數千人獨錦衣如昔豈若習游民擁冠帶朝榮簪笏夕困縲紲乎哉且人之卑天下者爲其不能自食耳今之貴人何一非妾婦媚悅以來其上此婦偶激則彼婦逐之雖擁旄節坐樞廷逐則惴惴焉莫測其生死苟精吾術雖譎諫談笑之間天子無能相厄夫豈天子之威不優人若哉彼固自求樂雖桀紂終不忍殺優人自苦其生卽怒而見逐則亦安往而不獲吾優者且自古優人文士皆以洩孤憤於悲歌慷慨之中荆軻高漸離歌哭燕市者此也至若承平雅頌職在翰林名士名優則皆引爲奇恥故文之與劇皆天地所使誅奸雄闡奇烈存人道幾希今舊學將亡韓愈復生且將餓殍况中西文皆繁劇日言教育雖累百世終不獲及愚氓劇則天子庶人乃無不樂千鈞一髮厥惟吾徒子獨奈何欲使吾子孫

入官吏作游民耶穆相孫之爲伶也家人強歸襲伯爵不可或怪之相孫曰吾以一身備帝王將相威重一時此胡爲者或曰子之帝王將相乃僞耳孫笑曰嘻天下事何者爲真哉客大慙而退而汪桂芬則尤奇汪桂芬者失其地少侍長庚職胡琴久之通厥奧用治劇名嘗與楊月樓俱出鑫培上鑫培領供奉桂芬獨傲睨不借少不娶無室家獨御道人裝首金圈約其髮軀微貌寢出演則傾國赴之京伶高者暮出纔二齣報輒百金桂芬耻言金無食則出飽則否鑫培不至主人乞桂芬曲罷齣授二十金輒去鑫培至桂芬則堅索齣必五十金外此雖 太后召示重金不至客慕其高潔飲之至巨館門則返飲陋館則狂喜歌呼客喜請奏歌不可則掛胡琴館壁上酒酣桂芬輒自取高調入雲恒數齣不倦客怪之桂芬笑曰歌以樂吾天耳日娛貴人贍家室則優人矣客大驚喜曰子其他耶則狂飲而罷久之厭京師遊上海諸名妓爭請拜門牆授以音則傾一市都中戲劇甲天下

妓習歌舞京伶至妓必求宿乃大歡不得則壽五十金求一夕宿月樓之游上海也諸妓尤樂其風采劇園罷爭逐之兩夕或鍵戶強桂芬則竟夕端坐瞑而鼾無視者諸妓歎曰此天下人也久之桂芬太息曰吾始嫉都下貴人乃遊此今諸妓屏廉恥乃不下貴人浩然返京師 太后聞其賢召領班不可桂芬歲可數萬金獨不取未幾沒京師是年秋 兩宮方蹕頤和園一日太后召樞臣畢 德宗奏曰 太后將以十月壽兒疾甚懼不克跪奉觴太后愀然太息曰吾且夕求汝愈豈在跪奉一觴耶 德宗跪謝不克與首伏太后膝 太后泣然掖起之於是 兩宮大哭樞臣宦侍皆流涕助哀朝罷而樞相某公獨攜四客玩西山快飲構詩鐘竟日鑫培聞其狀則流涕不言時光緒三十四年重九日也詩鐘者蓋起於科舉家求試律其法閉目指二字或指二物必取至不倫者強對之爲七言偶語字則引陳典故化納其中物則括其意而不必名其器蓋詩家之秘鑰名士之聲華官途之奧

中國五千年未有奇於此者某公之爲大帥也自鼎甲始喜用此弋天下才所至風輒盛鼎甲者科舉時殿試前三人也逮躋樞府諸名士爭以此弋之弋而不獲則以聲啗之蓋自是而詩鐘乃遍都下未幾兩宮之變作矣德宗之疾也蓋十年自重九退朝勢且劇太后憂勞亦重疾皆強起臨朝冬十月初旬方舉萬壽返宮庭德宗病亟不能賀大臣命優人治內劇如常鑫培歎曰此何時尙治劇耶則稱疾不入二十日詔嗣皇帝入明日德宗崩以醇親王攝大政又明日孝欽皇太后崩十一月十一日嗣皇帝即位於是攝政王典禮議作議者多請王駐外宮肅內外某公持不可某大臣爭之某公陰進曰此瀛臺故智也逾月罷之初大行之喪警廳示百日毋音樂詩鐘之盛乃倍昔時諸名士爭刻其詞播都下高者至以除夕簡巡守道云宣統元年春二月十二日屈百日期警廳示都人開劇肆都下大歡爭治劇鑫培諸弟子乞開場鑫培涕泣曰吾雖優人荷先后恩首伶官

邀巨祿例典凡士庶親喪二十七日中且不得事音樂今天子諒闇大行未出忍事此哉持不可已而德宗殯西陵其徒窮益甚哀之鑫培歎曰今都下劇園爭演劇若曹久困吾安可復持特被恩遇不能自爲耳自長庚鑫培用劇肆參其徒某日報兩人蒞臺則觀無隙地不出則趨者輒稀久之兩人雖老或強起瞻其徒爲門戶及是鑫培久不出其徒相率跽堂下痛哭曰今大行逾百日久王公爭譙樂或手檀板擁觀姬親度曲爲豪某帥尤以手胡琴度曲娛客名天下宰相賢者且爲詩鐘弟子爭巨官公奈何局守程朱獨忍我曹餓死耶鑫培謝曰王公將相皆可爲吾安敢事此鑫培憚妻甚往時恒不出徒則賂其妻迫之及是妻復痛陳徒窶狀乃強出謝其妻退語其徒曰若曹陷我無面見大行地下矣則泣下沾襟蓋其時云大行逾二百日矣自長庚造鼻音法音輒出丹田京師劇一變既沒不獲見乃見桂芬月樓已俱沒今獨是鑫培而其傳獨秘客嘗聞諸月樓矣月樓嘗客曰

吾師奏曲名天下靡法弗精古大家皆若此獨觀其將出先日夕輒靜默不聲明日履臺默益甚曲至諸良工多切奏彼則淡澹出之促節則急奏無留行獨致精結語至尾聲雖平調必千迴百折愈吐愈高響徹雲霄而後已此其運氣仍至神手吾儕特一體且以名天下嗟夫吾師其聖矣乎故天下號曰伶聖云鑫培之出也三日其帥及復手胡琴高唱猝中風又十日竟死詔褒卹焉鑫培歎曰此吾賢弟子惜乎運氣未精也都人言長庚鑫培設劇團絕淫劇身任文武老生掌班事獨儼重未嘗嫖其徒故不事鞭笞語出如帥令尤敬禮賢士傲王公長庚性清約既老恥爲伶弟子泣求間一出歲暮則徒步遍謁皖人官京曹者投紅柬具酒醴譙之譙則元服奴冠出酌客謝曰長庚苦貧不克養父母墮伶伎辱諸公出則側行伺車下退則修紅柬躬教金爲貧者壽必納乃歸晚旅櫬貧者不克還則斥千金治義園安旅魄既沒鄉人猶感其義備印結伙其從孫皆入官鑫培性豪邁急人難有俠士風

申湖北災獨率諸園治義劇三日所獲數千金爲賑獨自負其伶治常劇無殊持獨喜若長庚爲諸葛亮劉基則鬚眉畢至尤喜治程嬰保趙孤諸慘劇曰吾慕此數人不獲聊以洩吾悲耳且曰吾與先師隨所造成一家言司馬遷不能過况齷齪貴人哉此兩人出入內廷數十年風采動天下未嘗乞恩澤京西白雲觀有道士常以道法通王公爲人謀寵官輒驗士大夫或壽萬金乞此兩人結內監希寵遇兩人則奴叱標諸門其節概如此

贊曰月樓之道其師至矣凝靜致遠如此夫吾不解聲律戊申秋七月某帥至公謙始一見鑫培觀其妙造自然蒼涼悲壯則固遷史之音哉當是時某帥方冠帶坐中庭宰相以下數百人皆側坐酒酣鑫培方曲罷易服趨帥座勞之帥起立應對維謹余大驚客曰子未入長安一帥烏足道王公宰相見鑫培且然蓋其名重天下久矣余太息久之然鑫培獨折王玉峯歎爲弗及王玉峯者少警獨造三絃數十年爲戲曲出則列三絃盛錦囊几上端坐若

枯僧久之絃漸作座客指何曲自金鼓簫笛若鈸鏡若諸琴若男女譏笑步履聲欬下至犬馬蟲鳥聲一齣中音節歌呼輒若數十人奏臺上乃皆一指所爲蠡培聞其妙禮至園林指一齣請奏之已而歎曰此千古未奇技絕也嗟夫士安有不至道而能至藝者吾愧子多矣長庚故多賢弟子蠡培弟子不克畢其師國戚之哀賢者蓋寡然彼固求食不官遜詩鐘弟子遠矣桂芬擅奇技不下蠡培乃獨超然絕塵俗仙矣哉吾觀釋迦重平等王公貴人則曰此優人也悲夫客言月樓懷甯人意態雄傑享園林圖畫擁名姬見者驚爲名士獨盜貴家女類清流故不著

異伶傳終

友堂堂終付汝彌天四海爲沈吟張季直亦贈云幾年京洛吳公子買石揮金肯就貧亦幸尙饒花乳豔不愁壁立對佳人

周柏屋有句云男兒欲不負當世能蹈白刃輕黃金瘦公有句云欲闢地球新世界只須白刃與黃金同用白刃黃金字周語豪爽吳語冷峭

金陵女子王素琴有句云鴉啣新月上燕帶晚風輕何輕倩乃爾昔秣陵紀阿男映淮有棲鴉流水點秋光此不多讓也

王遠岑句云兩岸春山相向綠晚煙如夢隔江南林浚南句云兩岸鷓鴣雙槳雨落花如雪過江南皆有畫意似漁洋集中語

福建歸化以三月爲小清明八月爲大清明亦習俗相沿傳爲故事沈石埏福州竹枝詞云院牆八月昏風箏牆外兒童逐隊聲捲到越王墳醞酒更無人說小清明

余少有句云久坐楊柳陰一片鳥聲綠黃兩人師譚潤奇賞之謂字字皆有

神理又春雲愁裏重宵月別時圓二語亦謂爲名句光之致力于詩實由茲始師一生困于帖括不暇肆志爲詩然偶作輒工遊孝陵云八朝古碣陵南北兩世緇流帝祖孫偶成云轉于春閨憎花密直爲山幽愛路長贈先大父云性難諧俗非關傲事不因人始算才詰嗣魯鳧茂才甲森亦有雋才嘗言輪迴之說不可不信當于每年花開花落驗之有句云更番叅逗輪迴理一世楊花再世萍年二十餘病歿師作聯云荒爾讀不得死勤爾讀不得生作個錦繡才人也須福命非我兒何以來是我兒何以去却怪閻羅包老錯註因緣

文道希師詩以未窺全豹爲憾庚戌夏于沈太侔索得吳廩公代刊雲起軒之本言師詩全稿約五百餘首茲所存者乃摭集彙成非其至也謹誌詠史云漢四百年基沛縣元三萬里極歐羅佛家別有河圖讖未若金輪世界多帝出東方本聖言烏龍王氣啓金源我讀羣經无字說更從西海望昆侖杭

愛山邊有一方白翎原向海邊翔何因牧馬思南土天子中原乃衛王別傳虬髯事不真近人道是蓋蘇文若非晉水真龍起丹穴將求海外君賭碁別墅是兵機射筈聊城未解圍千古英雄惆悵事秦王十八已龍飛庚子有感云誰言國弱更佳兵其奈狂王憤已盈鐵騎晨衝丹鳳闕金輿宵狩白羊城何人能屈橫流溢今日真憐大廈傾無分麻屨迎道左收京猶望李西平北狩烽烟越幾時西行旗鼓更堪悲 朝廷衰職尊藍面河朔軍符授赤眉目斷汾河惟鴈到心驚滄海有龍移孤臣淚灑荒江畔忍痛新裁變雅詩峭澗形勢本天然王氣銷沉九百年但使東南漕底柱漫愁烽火徹甘泉羽觴露涖瑤池讎仙掌晴開玉井蓮回首烏龍江上月秋風清淚泣銅仙燕秦莽莽舊山河到此誰揮落日戈未必平原頭可篋更無延廣劍橫磨漫天風雪堯年冷誤國衣冠宋鵲多陳陶詩禁掖衣冠加宋鵲前後沈楊得料霜晨攬鏡未蹉跎又山居一首全用佳韻添入八九字奇闢典雅可當張茂先博物志讀詩見孫

師鄭前輩眉韻樓詩話中

李潛隱觀察有風來天異色五字眼前景指出遂成奇句又斷句如寥落風塵牛馬走迷離煙雨鷺鷥寒客裏逢春添別恨愁中度日有新詩有書得讀能驅悶無客來探早閉門皆佳潛隱蚤年好遊俠三十歲始學詩多感愴身世之作又李世純太守客蜀有句云萬里歸無路一官難上天勝事料貧先便廢好懷當病亦常開亦復牢愁蘊結官多于益宦味苦人良可愼歎潛隱名禊一名元禮內務府漢軍正白旗人李名錫嘏江蘇人

煙細明松毛水淺漱石骨近人李三石句也使遇黃涪翁則以爲佳句矣山谷賞謝無逸詩山寒石髮瘦水落溪毛凋得母類是無逸又有句云貪夫蟻旋磨冷官魚上竹山谷並謂爲雋句究亦味同嚼蠟耳

袁墨溪俊全椒人居金陵以鬻麪筋爲業人呼爲袁麪筋訪友人一絕云幾曲疏籬認不差趁閒來訪野人家西風吹出秋多少處處牆頭扁豆花太湖

胡映渠家貧樵于司空山自號司空樵隱有詩云賣盡乾柴又濕柴自挑春色上長街肩頭放下乾坤闊兩面青山對對排

林浚南自名其詩爲劍氣簫聲集英邁豪縱抒感處能見性情寄人日本云日涌扶桑出海來相思千里隔蓬萊卷簾天地傷心色入夢河山去國哀江左已無王導略朝端誰是賈生才萬方多難無窮感懷抱何時爲汝開感懷云酒酣拔劍氣縱橫不學窮途阮步兵萬里關河雙鬢短十年湖海一身輕哀時涕淚狂猶昔亂世文章負此生怪底中原豪傑少紛紛豎子盡成名又警句時艱莫補難爲用年少能狂亦可哀運去射鵬皆走卒時來屠狗亦材官兩地交存生死裏十年人在別離中俱有韻致浚南論詩以不墜先輩典型爲上於其鄉人中獨不取黃公度其志亦可嘉矣

胡墨薌先生錦翰有新竹如少年之句人稱爲竹人詩翁遂自號竹人善書工詩人得其一縑者可易數金舟過赤壁云赤壁但成坡老名區吳界魏柱

相爭丈夫休薄毛錐子兩賦雄於百萬兵佳句如晚煙沈半嶺疎雨見孤星
名心隨老盡詩思入秋多溪迴山徑曲木落岸容低不愧名人吐屬又咏焚
香云心因太熱成灰易力未禁風定性難圍棋云只爲日長聊共遣非關路
狹苦相拚妙在言之有物絕無粘滯之形咏物如此詹詹小言家何曾夢見
也

杜詩白鷗波浩蕩萬里誰能馴宋釋皎然謂波字當作沒字道人北山來問
松栽南岡舉手指屋脊云今如許長栽字當作我字因形改竄亦似有理究
不及教妾苦爲容暝色赴春愁之別有神味也

蒙古游牧地居室甚陋俗謠有云遠看一座墳近看卻有門門中何所有牛
羊狗合人形容曲盡亦堪捧腹寶文靖公蓋有詩云牛羊子女共盤桓物與
民胞眼界寬更有神仙風趣在一家雞犬漢劉安延子澄學士清和之云胡
服軍容失糾桓居然袖大與袍寬笑他人合牛羊狗共處窮廬享宴安

林和靖詩云馬從同事借妻怕罷官貧韓昌黎詩云莫爲兒女態戚嗟憂賤
貧老杜詩云浮生有定分飢飽豈可逃歎息謂妻子我何隨汝曹皆淡于榮
祿不爲妻孥戀棧之語浙江徐小雲尙書用儀年七十餘決意乞休其姬人
抱幼子在側曰何不爲此兒作官半年尙書從之遂罹庚子之厄使早讀韓
杜諸公之詩當不致爲兒女子所誤也

江退谷上舍思進得句云一對黃鶯穿柳嘯自謂絕妙經數月乃琢成此句
余曰君不聞楊衡有得意之句乎一一鶴聲飛上天人不解其妙處是語得
母類是然江詩恰有佳語月嵌冰鏡合霜拂寶刀明蘆花兩岸雪樹影四圍
山青山入靄依稀見白鳥依船自在飛均鏗然可誦退谷患目疾漸至失明
有人以折字出聯云三年害目三分瞎退谷應曰一段秋心一點愁亦警敏
可喜

提籠忘采葉昨夜夢漁陽襲卷耳詩意可憐無定河邊骨猶是春閨夢裏人

襲李華弔古戰場文其亡其沒家莫聞知人或有言將信將疑隨心日夢寐見之之意曹子建洛神賦亦由碩人詩脫胎而出如此變化使人不覺其有藍本斯謂妙手

京曹多暇日書本滿車中元人卽有此語余有句云長年三百六十日顛簸笨車四之一某部郎多兼差讀之曰此詩若在我集中當作十之七矣安甫少司成關普通武拜年詞有云周遊踏偏九衢塵帽影鞭絲入目頻誰說京官不奔走年年車裏度新春又云新年拜賀禮文嫻太上人情重往還最惱遣人投一刺居然禮在有無間寫京官閒裏着忙之處令人捧腹

安甫先生尺五園詩數卷以秉節湟中諸作爲得山川之助重九遊南禪寺云山空木落九秋時憂國憂家值亂離憑檻思鄉王粲賦插萸憶弟輞川詩故園烽火五千里異域寒花三兩枝更有愁腸人莫識登高東望翠華旗難得重陽一日晴鳳山高處俯青城萬家烟火承平象比戶絃歌樂歲聲已

都人士綢直如髮 慧琳音義三十四五十三六十二引傳稠密也今奪

瓠葉炮之燔之傳毛曰炮 文選西都賦注慧琳音義五十八引作以毛曰

炮今奪以字

漸漸之石漸漸之石傳漸漸山石高峻 慧琳音義七十五引作漸漸山石

高峻兒也

大雅

文王序文王文王受命作周也注制立周邦 案制立周邦上當有作周二

字今奪

大明小心翼翼箋小心翼翼恭慎兒昭明聿述懷思也 文選干令升晉紀

總論注引箋翼翼恭順之兒也又懷思也下有謂能明事上天又能述思

多福十二字今奪

絲絲瓜瓞傳絲絲不絕兒 慧琳音義八十一九十引作絲絲長而不絕兒

也

未有家室傳邑乎岐山之下 乎文選晉紀總論引作于

周原膺膺傳膺膺美也 文選張載七哀詩注引作膺膺肥美也

思齊肆戎疾不殄 傳當有殄絕也句今奪

譽髦斯士 傳當有髦俊也句今奪

皇矣奄有四方 箋當有奄覆也句今奪

攸馘安安傳殺而獻其左耳 慧琳音義八十七九十九引無左字

下武昭哉嗣服 箋當有昭明也句今奪

文王有聲逖求厥甯 箋當有甯安也句今奪

生民載震載夙傳震動 慧琳音義六十三引作娠振也震動於內三十二

三十四八十八又引箋動者懷孕也今奪

誕彌厥月箋大矣后稷之在其母 後漢書殤帝紀注引其母下有懷也二

字

克歧克嶷傳嶷識也 慧琳音義引作嶷識別也

行葦介爾景福 箋當有景大也句今奪

鳧鷖鳧鷖在深傳深水會也 慧琳音義三十八九十九引作深水會處

假樂顯顯令德 箋當有令善也句今奪

率田舊章 後漢書章帝紀引箋有由用也句今奪

公劉迺裹餼糧 文選曹植應詔詩注引傳糗糧食也今奪

既庶既繁 箋當有庶衆也繁多也句今奪

復降在原箋重居民也 文選干令升晉紀總論注引作重民居也

卷阿豈弟君子 箋當有豈弟樂易也句今奪

以引以翼 箋當有引道也句今奪

民勞無縱詭隨箋無聽於詭人之善不肯行而隨人之惡者 原本玉篇

部引作無聽於詭之善不肯行而隨人爲惡慧琳音義十引作無聽放詭而隨人爲惡也

板詢于芻蕘 後漢書胡廣傳引傳有詢謀也句今奪

無然謔謔傳謔謔然喜樂 慧琳音義三十五五十六引作謔謔喜樂也原

本玉篇言部引作謔謔然喜樂也

曾莫惠我師 箋當有師衆也句今奪

民之多僻 慧琳音義四十六四十七引箋僻邪也八十九引箋僻謂邪僻

也今奪

蕩其命匪諶 箋當有命教道也匪非也句今奪

覃及鬼方 文選陸機五等論注引傳覃延也今奪

殷鑒不遠 箋當有鑒明鏡也句今奪

抑敷求先王 箋當有敷廣也求索也句今奪

燬於紅羊劫火意者萬松遺蹟不至終湮或是處之伽藍猶足爲彼教護法歟

金剛經靈異

某甲者居京師市井人也一日所居忽有大蛇憑之蜿蜒不知幾許見者皆驚怖某怒甚持巨斧伺其出擊殺之且烹以食臟腑痛楚遂卒心尙溫家人異之未敢斂後七日忽蘇曰初見冥使數人追捕暗行數十里見一人獨行金光繞身照耀數丈外經聲瑯然光漸近問之云趙姓名某常誦金剛經者汝但莫離我使者不敢近也即從之使者忽不見不覺至其家某拜謝曰向不遇至人定不返矣其人授以金剛經俾成誦乃去蹶然而蘇開目乃在臥榻上及復生試持誦更無遺闕其疾亦漸失因斷酒肉不復殺生日諷五十五通常以此度世頗有信奉之者或曰某之疾蛇爲之夫蛇旣已極巨宜有霧烏有殺之而不怒者冥使之說特某之驚魂未定至一遇金光中人其使遂

亡去可知其幻也是說不盡然亦不必不然而金剛神有固有不謹此者區區一蛇烏足論其有無哉

鬼覓代

某邸第居皇都之偏隅有廢園不知幾何年圯牆苔繡荒徑竹斂人跡既稀境愈幽闐園南有小池甃爲半月形水不及四五尺漣漪可愛夏日鄰兒游泳其中恆有溺死者光緒乙亥冬夜月色大明有某甲日事飲博時已被酒歸忘其荒僻將近短垣忽青衣婦遮道相阻哭且訴云丈夫無良性復好賭前日將妾簪飾攫去並搜筒篋席捲一空今又向索辭以無有竟奮拳亂擊幸隣家李媪勸止計旦晚必死不如自我某向有登徒好即溫語撫慰月下視之顏色姣麗方欲向前擁抱婦忽變相髮赤頰青流血被面某大駭昏不知人比曉人見其抱石僵臥救治得蘇自述如此咸以爲溺鬼思欲求代然非某甲之有以自召鬼亦何所藉端某甲當死而不死或別有其數存要皆

可爲狂且戒

魔試道者

咸豐間京師長白某君駕部主事因病獲愈爲陰司走無常年踰六旬榮利盡澹古寺儼然坐以終日久之自覺萬緣俱寂與太虛遊嘗與人言初坐時寸衷煩躁不安既坐之一月心神志意如左右飛躍上下紛馳益復昏亂二三月後則智識漸定妄念不生持之三月心清如水意若死灰期年貪曠外緣不啻盡絕靈府如明鏡湛然常清頓覺一已元神自頂門出初至身關目視之見魂縮小才三寸許面目手足與已無少異聞人聲輒驚縮久漸無畏尋出戶牖遊院中二年後竟游街市飛行幾至十里外三年已及百里大地山河人物鳥獸瞭如指掌過去未來彰察已無遺蘊仙殆將成矣然道既深魔益厲耳際始聞風聲濤聲雷雨聲虎嘯牛吼聲又聞鬼神號哭金戈鐵馬聲某心不爲動少選魔退乃既止復作生平最愛花牡丹茉莉尤所篤嗜靜中

忽聞一縷香類牡丹復雜抹麗開目微視見無數名花羅列眼底欲下牀試
 摘取忽悟曰此魔也覆視其花香色俱無一日正瞑坐聞隔牖展齒聲若躡
 利屣者俯仰之間簾鈎擡起步已履闥蓮瓣雙翹漸至臥榻繼聞紅粉肌香
 豔如蘭麝一例噴溢氣欲蕩人即堅持正覺妄念不生徐聞嘆息語如鶯燕
 約略可辨坐近身邊更依膝股探纖手摸遍體還以桃腮搵面視之一麗人
 羞地至嬌波欲溜羞顏若頰將言復止弱不勝衣向之歛衽再拜某離諸色
 相有若花自照鏡鏡不知花月自臨水水不見月轉瞬色魔退閱年餘無所
 見以為道幾成矣一念甫息覺有物重壓其頂窺之係一巨石以長繩繫之
 懸於空際搖搖不已若將墮者忽若然有聲繩斷石墜落於其前途冥然一
 身聽其自斃終不恐怖已而寂然無所見微意此魔既去當無所擾俄又見
 無數厲鬼或披髮咋舌或斷頭折臂汚血狼籍穢逼人執炭藜骨朵或長
 刀短仗向身亂擊兵械著處忽寒忽熱雖不劇痛楚然頗覺不安竟任其肆

宣統二年冬十一月

靈集詩存

廣陵吳仲署于鷄林

序

詩三百篇尙矣嗣惟有唐稱盛李杜而外代有作者我朝詞章之盛遠邁前代詞人騷客形爲詠歌卽學士大夫不少風雅之才而其人性情學問與其事業勳名於是乎見如傅雪樵明府不亦卓卓當世者哉哲嗣念堂爲余甲戌所得士曾出其尊甫手著古今雜體二卷類多因時感事之作或寓意於言中或寄意於言外或纏綿悱惻發其忠孝之思或慷慨激昂抒其悲歌之氣詞旨莊雅卓有唐音而溫柔敦厚得三百篇遺意蓋由其天姿超越復規短於先輩名程故形爲詩歌具有心性也雪樵篤於至性家居以孝聞幼邃於學弱冠登賢書自黔匪爲亂投筆從戎叅謀帷幄器重上游軍功保知縣授山左冠縣令甫下車循聲卓著未幾粵寇破城全家殉節蒙恩賜卹其精忠大節彪炳人寰豈得以詩人目之哉然卽其詩以想其人卽其人以考其事蹟而其詩以傳其精忠大節亦傳吾未見雪樵之爲人而將見之以其

詩也是爲序

同治十三年歲在甲戌仲秋之月

賜進士出身侍讀銜 記名御史翰林院編修張鴻遠拜序

國史忠臣傅士珍傳

傅士珍雲南昆明人道光五年舉人十五年大挑二等以教職用二十年選授羅平州學正二十八年永昌匪徒滋事隨同勦辦出力雲貴總督林則徐上其功得

旨以知縣用二十九年選授山東武城縣知縣咸豐二年正月兼署夏津縣知縣十二月以捐助軍餉

賞加同知銜三年山東巡撫李德檄赴兗州差遣設糧臺於曹縣令士珍理之旋馳援河南懷慶復檄士珍辦理行營糧餉六月代理冠縣知縣四年三月粵匪竄擾冠縣士珍率文武登陴守禦殺賊數百賊樹雲梯環攻城陷手持短刀巷戰殲賊目數人被執不屈遇害甚慘妻楊氏妾朱氏姊王傅氏偕士珍兄子企灝及二女均罵賊死幕友與男女僕從相率殉者數十人事

聞得

旨照陣亡例從優議卹並於殉難地方建立專祠其妻楊氏妾朱氏姊王傅氏姪傅企灝及其二女並幕友王錫藩潘遵誥王汝庚鄒學鈞劉家驥王樹人王壽昌秦豐城均議卹附祀尋

賜卹如例

賞雲騎尉世職襲次完時以恩騎尉世襲罔替子培基襲同治十三年進士

刑部主事

雪樵詩存卷一

昆明傅士珍獻廷

行篋墨潘古今體詩五十七首

甲午冬偕計吏以嘉平五日始趨裝途中多雨雪又兼程而進酒闌夢醒時偶爲古近體詩未能多也乙未下第後留京溫卷至丙申夏乃旋漢時方攻帖括朝經暮史之餘閒亦有作仍未能多經年得詩數十首心血所存雖不工不忍棄錄而存之曰行篋墨潘丁酉八月雪樵自識

將北上拜別 先父母墓 甲午

昔我計偕親尙健夕膳晨羞兒自勸今我計偕親已徂蕭條子舍餘孤雛萬里征人感霜露再拜焚香別親墓兒呼親兮不聞聲親魂猶隨兒遠行吁嗟乎吾親棄兒何太早風樹蕭蕭傷懷抱年年告墓作遠游恨不身爲吾親墓頭草

出門口占

久客輕游遠搖鞭出門去嬌女牽爺榻問爺向何處

板橋旅次偶成

街頭臘鼓報新晴三度公車賦北征老驥自存千里志美人已守十年貞雲山到處供詩料兒女無端繫別情此去不嫌行路遠癸心久向日華傾

楊林感事

我觀前代史災祥必謹誌非以廣異聞意在戒人事滇南去年秋診戾忽焉至頽雲自西來天鼓聲震地斗然山岳搖乾坤相軒輕大厦不能支屋瓦紛紛墜坐使朝食人斷頭更折臂哀哉十餘州同時罹禍崇見說此間人傷殘尤可憐至今黃土中時有白骨棄每聞楚些聲行客皆垂淚太息彼窮黎何以干天忌卹災 聖主恩掩鬻仁者意生衆幾時謀清付循良吏

楊林道中二首

霧濛消盡曉雲開石徑無塵馬足催一路波光山色裏天風吹過小蓬萊
前村楓樹露疎紅雁帶餘聲入遠風倦枕殘書看山色籃輿緩度夕陽中
白水道中遇雪

長空剪水風如刀玉山不動頑雲高大地忽作光明界疑有白鳳相翔翺坐
我肩輿如縮蝟尻輪神馬空游遨寒烟冥濛羃村落飛花歷亂侵征袍午睡
初醒夢魂冷卯酒猶在詩情豪耳衣絮帽如潑水不龜手藥空持操誰家此
時擁裘坐珠簾繡幙圍周遭玉人半醉春色煖酒香飛上琵琶槽豈知窮簷
無襦袴那寒難避心忉忉輿夫亦復起寒栗輿中人豈知其勞撫膺太息肺
肝熱博施無計頭頻搔安得萬里之裘千間厦坐使斯人婦子無啼號
平彝縣

路出疎林外山圍古堞齊地形連爨北人語雜黔西積雪融城溼寒雲擁樹
低離家纔七日歸夢未應迷

平彝所

滇山到此截然住萬點黔山橫去路亂峯隙裏走黔西莽莽寒雲鎖煙樹此
去京華路八千霜橋月店送吟鞭馬蹄明月青天上回望家山隔曉煙

上寨道中

百盤石磴凍雲浮萬里寒光集成樓紅樹青山送行客滿天風雪過盤州
上拉邦坡放歌

一山迎一山讓山山迥出青雲上一山突兀尤高絕陽岫陰岩鬱相向疑是
扶輿不平之氣所蟠結擲向黔西道中作保障雁飛不到山之巔籃輿直上
如登天夏日難消太古雪春風不散寒林煙石徑盤空露一綫羊腸屈曲龍
蜿蜒既無列子御風術又無祖龍鞭石鞭安得騎鶴驂鸞到九乾稽首玉皇
香案前初啓黔道多險阻再陳黔民多顛連願乞天公遣力士爲離疊障成
原田瘠土盡變爲沃壤斯人同甘太極泉天鼓難擊天閭遠我舍此意何時